



UNIVERSITÄTS-
BIBLIOTHEK
PADERBORN


De Institutione Principis Libri Tres

De Meyer, Liévin

Bruxellis, M.D.CC.XVI.

Ad Augustam Imperatricem Elisabetham Primo Partv Serenissimi
Archiducis Leopoldi Fœcundam.

[urn:nbn:de:hbz:466:1-68662](#)



A D

AUGUSTAM IMPERATRICEM
ELISABETHAM
PRIMO PARTU
SERENISSIMI ARCHIDUCIS
LEOPOLDI
FOE GUNDAM.



*Æta novo partu, fœcundaque principe mater,
Solaque Cæsareo digna reperta toro:
Dum tibi Calliope meritos meditatur honores,
Si vacat, ad laudes & tua sacra veni.
Se tibi Majestas, terræ quæ temperat orbem
Junxit, & imperii sceptra tenenda dedit.
Pronuba Religio sponsam deduxit ad aras,
Virginitas niveo ponè secuta gradu.
Et Pudor & socius Decor est comitatus euntem.
Divus Amor castas prætulit ipse faces.
Et super augustos volitans Hymenæus amantes,
Pectora purpureis sparsit & ora rosis.*

a a

At

At Romana Fides tanto præluxit honori,
Majus & humano contulit illa decus.
Ista tamen vetus est, cantataque vatibus olim
Gloria : sublimem me novus ardor agit.
Tu, quæ materiam, vires quoque suffice vati,
Et fac ne meritis inferiora canam.
Ordinar unde tuæ, dubium est, præconia famæ,
Obruor incepto : copiaque ipsa nocet.
An faciem laudem? Veneris tibi cedit imago.
An mores? Juno non negat esse suos.
Ingenium mirer? Dote hac cum Pallade certas,
Nec renuit palmam cedere victa tibi.
Olim de facie tres inter maxima Divas
Rixa fuit : formam quâque probante suam.
Pastor in Idæo certamina colle diremit,
Judice quo, victrix de tribus una fuit.
Tempore si redeat nostro Paris arbiter alter,
Tres poteris triplici vincere dote Deas.
His par nobilitas, seriesque accedit avorum,
Quæque micant titulis scuta paterna suis.
Alteram materno de stemmate gloria stirpi
Surgit, & est gemino sanguine clara domus.
Si quis prima tuæ querit primordia gentis,
Ille cupit fontem noscere, Nile, tuum.
Ipse vetustatem Cæsar probat : ipse merentem
Judicat augusto ponere membra toro.
Ipse cupit geminam miseri sanguine stirpem.
Et quid nobilius Cæsare mundus habet?
Jure igitur tanto sub judice tuta superbis,
Et tibi pars famæ salva stat ista tuæ.
Summa tamen laudum est, genito quod principe, serves
Per te victurum, perpetuumque genus.

Cetera

Cetera deficiunt sensim , fatoque premuntur ,
Solaque fertilitas , unde supersit , habet .
Adde quod ingenium , quod forma , & gratia morum ,
Grande , sed unius , sint tamen illa decus .
At dare Cæsaribus natos , ad publica spectat
Commoda : privato res ea jure caret .
Maternos igitur merito celebramus honores ,
Non magis hac ullâ dote placere potes .
Non tibi par , nostrum quâ sol despectat in orbem ,
Inter fœcundas altera nomen habet .
Tu Nioben utero poteris superare feraci ,
Quamvis septenâ prole bis aucta fuit .
Illa puerperio steriles immiscuit annos ,
Tardaque diviso tempore mater erat .
Non tibi post primum cessant turgescere partum
Viscera : nona recens luna resolvet onus .
Quid , quod adhuc primo pubescens flore juventa
Spem duraturæ fertilitatis habet ?
Quid , quod alit Cæsar generosam in pectore flammam ,
Quâ genitor canâ possit & esse comâ ?
Regna suis Niobe nequit dare singula natis ,
Scilicet huic Phrygiæ regia sola fuit .
Tu septem numeras populos : totidemque coronis .
Cingitur Augustæ , Cæsareumque caput .
Quotque feres natos , totidem potes edere reges .
O , in quot titulos sufficit una domus !
Quid decora enumerem fragilem superantia sexum ,
Ætas nulla tulit qualia , nulla feret ?
Multâ quidem sæclis sunt clara prioribus , & quæ
Nomen ab eterna posteritate ferunt .
Laude pudicitiae Lucretia , marte Camilla
Nobilis , Andromache Penelopeque fide .

At

*At tibi si quisquam veteres heroidas æquat,
Hic soli stellas cedere posse neget.
Quidquid in antiquis prisca est mirata vetustas,
In te collectum, conspicuumque micat.
Utque suis ornat Cæsar virtutibus ævum,
Cultaque nil illo sanctius ara videt:
Sic tu virginibus præbes exempla pudoris,
Censuramque tuam, si qua soluta, timet.
Vivite concordes sæcli duo lumina nostri,
Moribus intactis & probitate pares.
Felix conjugium, & dignum cui conferat æther
Munera cœlesti multiplicata manu.
Deficit in vobis, qui carpit cetera livor,
Et nihil obliquo lædere dente potest.
O facias (te namque colunt) pulcerrima Divum,
Fulta sit ut multa regia prole domus.
Nullaque sit toto genitrix fœcundior orbe,
Dividat & natis oscula plura suis.
Sint matri similes, sic ut noscatur in illis,
Et genitor tenero possit in ore legi.
Indole præcipue referant animoque parentes,
Gestaque cum niveo grandia lacte bibant.
Hæc, regina, vovent toto tibi pectore Belgæ,
Quæ rata sint, cœlo vota probante, precor.
Conjuge cumque tuo canos cum expleveris annos,
Dent tibi, dentque illi, sidera tarda locum.*

D E